

RODERICK, JOHN ('John neu Siôn Rhydderch'; 1673 - 1735), almanaciwr, gramadegwr, bardd, ac eisteddfodwr

Enw: John Roderick

Dyddiad geni: 1673

Dyddiad marw: 1735

Rhiant: Elen Roderick

Rhiant: David Roderick

Rhyw: Gwryw

Galwedigaeth: almanaciwr, gramadegwr, bardd, ac eisteddfodwr

Maes gweithgaredd: Eisteddfod; Hanes a Diwylliant; Barddoniaeth; Argraffu a Chyhoeddi; Ysgolheictod ac Ieithoedd; Gwyddoniaeth a Mathemateg

Awduron: William Llewelyn Davies, Enid Pierce Roberts, Llewelyn Gwyn Chambers

Arferid credu mai o waelod Sir Aberteifi yr hanoedd eithr dangoswyd (yn *Journal of the Welsh Bibliographical Society*, iii, 275-90) mai un o Gemaes, Sir Drefaldwyn, ydoedd; efallai mai ef ydoedd y John mab David Roderick ac Elen ei wraig, a fedyddiwyd yn eglwys Cemaes ar 23 Ebrill 1673. Ond yn B.M. Add. MS. 14874 (a fu'n eiddo iddo), t. 7b, ceir ' Llyfr Cywyddau Siôn Rhydderch, 1709; b. April 11, 1675 '.

Argraffodd a chyhoeddodd yn Amwythig yn 1728 *Grammadeg Cymraeg*; cafwyd ail argraffiad yng Nghaerfyrddin o wasg J. Harris yn 1824. Gyda John Williams, Witley, Swydd Amwythig, cafwyd hefyd ganddo *English and Welch Dictionary*. Yr oedd cyn hyn wedi dechrau cyhoeddi cyfres o'i almanaciau ef ei hun - o c. 1715 hyd un y flwyddyn 1736 - y rhain hefyd bron i gyd o Amwythig.

Yr oedd [Thomas Jones](#), almanaciwr arall, wedi cyhoeddi, yn ei *Carolau a Dyriau Duwiol*, 1696, dair carol gan Siôn Rhydderch; ceir enghreifftiau eraill o'i waith yn yr almanaciau a baratodd ac a gyhoeddodd yntau. Bu iddo gysylltiad agos â mân eisteddfodau ei gyfnod, o un Machynlleth (1701) ymlaen - câi yn ei almanaciau gyfle i alw sylw atynt. Ceir ' Englynyon o Fawl i'r Celfyddydgar Gadairfardd John Rhydderch ' yn ei almanac am 1726. Ysgrifennodd lawer o farddoniaeth ei hunan, e.e. marwnad [Huw Morys](#) o Bontymeibion, ac amryw eraill sydd yn aros mewn llawysgrifau.

Cyhoeddodd 'bapurlen' ar rifydddeg tuag 1716. Dichon mai hon oedd y drafodaeth Gymraeg gyntaf ar rifydddeg ond nid oes copi ar gael. Cyfeirir ati yn [John William Thomas](#), (1805 - 1840), *Elfennau rhifyddiaeth* (Caerfyrddin, 1832), 6, a [John Roberts](#) (1731 - 1806), *Rhyfydddeg neu Arithmetic* (Dulyn, 1768), iii.

Am y gwahanol lyfrau a gyhoeddodd yn Amwythig, o 1715 hyd tua 1728, gweler [J. Ifano Jones](#), *Hist. of Printing and Printers in Wales*. Ceir hefyd yn llyfr [Ifano Jones](#) hanes y cysylltiad (na ddaeth dim ohono) rhwng John Rhydderch â'r wasg yn ' Llannerch-y-medd, sir Fôn, y cyhoeddodd [Lewis Morris](#) ('Llewelyn Ddu o Fôn') ei 'gynnygiadau' ynglyn â hi ym mis Mawrth 1732. Erbyn hynny yr oedd Siôn Rhydderch, a ddisgrifir gan [Lewis Morris](#) yn 'Native of Mountgomeryshire,' mewn oedran ac yn ' reduced to very low circumstances.' Yn niwedd 1733 yr oedd Siôn Rhydderch yng Nghaerfyrddin yn trefnu i [Nicholas Thomas](#) argraffu almanac 1734. Erbyn 1735 yr oedd yn ôl yn Cae Talhaearn, Cemaes, Sir Drefaldwyn, a chladdwyd ef yng Nghemaes ar 27 Tachwedd y flwyddyn honno.

Bu i rai cofianwyr gymysgu rhyngddo a [John Rogers](#) a oedd, yntau, yn argraffu llyfrau yn Amwythig.

Awduron

Syr William Llewelyn Davies, (1887 - 1952)

Dr Enid Pierce Roberts

Dr Llewelyn Gwyn Chambers

Ffynonellau

Oxford Dictionary of National Biography

T. R. Roberts, *Eminent Welshmen: a short biographical dictionary of Welshmen... from the earliest times to the present* (1908)

Ifano Jones, *A history of printing and printers in Wales to 1810, and of successive and related printers to 1923* (Cardiff 1925)

Robert Owen '[Siôn Rhydderch yr Almanaciwr, 1673-1735](#),' *Journal of the Welsh Bibliographical Society*, iii, 275-89

Robert Owen '[Almanac Cyntaf Siôn Rhydderch](#),' *Journal of the Welsh Bibliographical Society*, iii, 347-8

Llawysgrifau Cwrtmawr yn Llyfrgell Genedlaethol Cymru, Aberystwyth 71 (5), 7 (15), 288 (A.521), 463 (9)

Llawysgrif Bodewryd yn Llyfrgell Genedlaethol Cymru, Aberystwyth 2 (35, 36)

NLW MSS 644 (66b), 783 (166), 1244 (D.33), 1580 (388-90)

Additional Manuscript in the British Museum 29 (4, 6), 51 (177)

Hugh Owen (gol.), *Additional Letters of the Morrisises of Anglesey (1735-86)* (London 1947-9)

Dolenni Ychwanegol

VIAF: [26939359](#)

Wikidata: [Q18783770](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

